



Igl arbiter Amir Mohebbi (sen.) e siu coach digl OFV Erich Furter (dretg) la sonda vargada a Degen. Grazia agl engaschi digl arbiter oriunds digl Iran sa la US Rueun separticipar al campinadi da ballapei.

FOTO ANDREAS CADONAU

«Bargir san ins buc adina»

Per munconza dad in agen arbiter ni in'atgna arbitra ei l'equipa dalla Uniun sportiva Rueun bunamein stada sclausa dil campinadi da ballapei. Per cletg ha ella anflau Amir Mohebbi, oriunds digl Iran che viva sco fugitiv dapi tschun onns a Cuera. El ha schulau la sonda vargada a Degen siu secund giug.

ANDREAS CADONAU/FMR

«He schiri, na, buc ina carta melna.» In tec hectica ha ei tuttina dau la sonda vargada sila piazza da ballapei a Degen el giug dils juniors C denter il Team Surselva e l'equipa dil Club da ballapei da Domat. La squadra da Domat ha fatg pulit pressiu ella secunda mesadad e marcu in gol suenter l'auter. El cumbat da defensiu ha ei dau in foul ed igl arbiter Amir Mohebbi ha tarmess ina giugadura sursilvana sil baun.

Il dudischavel um dalla US Rueun

Igl arbiter Amir Mohebbi deriva digl Iran, ei vegnius avon biabein tschun onns en Svizra sco fugitiv ed ha schulau la sonda vargada a Degen siu secund giug. «Gie, jeu sun fetg cuntents, schegie che jeu sun aunc vid imprendier.» Senza arbiter negin giug, quella devisa ei bunamein daventada realitad tier l'Uniun sportiva Rueun. Dus onns alla liunga ha il club da ballapei encuriu ina arbitra ni in arbiter. Aurelio Valaula, responsabel tier la US Rueun per igl arbiter, ha getg ch'ei seigi stau stentus d'encurir soluziuns per saver separticipar al campinadi. «Mintga club sto metter a disposiziun in arbiter.» Suenter dus onns senza arbiter fess l'equipa dalla US Rueun stada sclausa dil campinadi dalla 5av-

la ligia. «Mo lu ei Amir Mohebbi sepurschius, entuorn siat cantuns», ha Aurelio Valaula getg. Ch'els seigien vegnius en contact «via facebook». Amir Mohebbi ha getg cun in surrir, d'haver enderschiu che la US Rueun enqueri in arbiter. Da sia equipa da casa enconoscha el sulet Aurelio Valaula. «Gie segir, jeu less imprendier d'enconoscher l'equipa dalla US Rueun.» Auto posseda il fugitiv che viva a Cuera buc. El contonscha las piazzas da giug cun il traffic public.

Bandunau la patria

Paregliar igl Iran cun la Svizra ni il cantun Grischun sappi ins en negins graus, ha igl arbiter cun status d'asil getg. «Era buca pertucond il ballapei.» Amir Mohebbi ha dau ballapei en sia patria el marcu da Shiraz, ina capitala regiunala el sid digl Iran cun 1,5 milliuns habitonts. «Jeu erel defensur.» E co ei Amir Mohebbi vegnius a strada sco giugadur cun igl arbiter? «Jeu hai reclamau stedi.» Cun 18 onns ha Amir bandunau sia patria che porscha paucas perspectivas a gliend giuvna. Ses confamigliars ha el viu la davosa ga avon sis onns. «Via whatsapp vai jeu contact cun mia famiglia.» Secapescha ch'els confamigliars mauncan. «Ils emprems dus onns egl jester ein dirs.» Amir Mohebbi ha getg dad esser s'integraus fetg bein en Svizra. «Ti sas buca bargir adina». El ei dil meini ch'il

carstgaun sappi s'adattar. Amir Mohebbi ha empriu tudestg, el capescha schizun il dialect svizzer, lavura ed ei da buna speranza da saver restar en Svizra. Sche buc, stat el avon in avengir incert, e probablamein era la US Rueun. Igl Uffeci federal da migraziun ha aunc buca decidu, sche Amir Mohebbi sa star definitiv.

Arbiters ein tschercai

Persequitau il giug, respectiv la lavur digl arbiter a Degen la sonda vargada ha Erich Furter, sez arbiter e responsabels per ils arbiters enteifer igl OFV. «Gie, jeu sun fetg cuntents cun igl engaschi e la lavur dad Amir Mohebbi, secapescha e normal ch'el fa aunc sbagls.» Tgira in arbiter cun status d'asil ha Erich Furter aunc mai. Quei ei per el diluttatfatg secundar. «Jeu sun leds da mintga persuna ch'ei prompta da star a disposiziun.» Problems da recrutar arbitras ni arbiters han tut ils clubs. Bunamein fess igl engaschi da Amir Mohebbi ius dall'aua giu. Igl OFV scolescha ses arbiters el cantun Turitg. Ed il foul ch'igl arbiter oriunds digl Iran ha schulau la sonda vargada a Degen? «Jeu vai gia giu admoniu la giugadura ina ga, aschia che jeu sun staus sfurzau tiel secund foul da tarmetter ella sil baun.»

LAUS – VADUZ

Il resultat d'ina acziun caritativa

Il Chor viril da Vaduz pren investa dalla renovaziun dalla caplutta da Laus. Ils cantadurs dil principadi dil Lichtenstein han susteniu finanziamein la renovaziun

PAUL DUFF/FMR

La renovaziun dalla caplutta da sogn Luregn a Laus ei finida gia avon varga vegn onns. Da gliez temps havevan ils commembers dil Chor viril da Vaduz, il «Männergessangverein Vaduz», recaltgau ina biala summa per sustener finanziamein las lavurs. Lur concantatur *Linus Deflorin*, oriunds da Laus e gia varga 30 onns commember dil chor da Vaduz, ha envidau ils commembers da prender investa dil pign sanctuari e far ina viseta a Laus.

La dumengia vargada ei in car vegnius culs passagers si dalla Bassa egl uclaun. Ladinamein han ils umens intonau treis canzuns en caplutta e dau honur a sogn Luregn ed als avdents da Laus. Sut tetg en tenda han ils hospes gudiu in aperitiv e dau ina paterlada culs avdents dil vitget. Da l'autra vart dalla val, a sogn Benedetg ei vegniu presentau la veta activa dils avdents da quei uclaun. Special interess ha la caplutta da sogn Benedetg leventau. Silsuenter ein els stai da cumpignia e gudiu in gentar ell'ustria Miraval per returnar encuter sera puspei a casa.



Ils cantadurs dil «Männergessangverein Vaduz» han visitau igl uclaun da Laus e cantau treis canzuns ella caplutta da sogn Luregn, la quala els han susteniu finanziamein a caschun dalla renovaziun.

FOTO PAUL DUFF

SURSELVA

Dalla PCD giuvna tiel Giuven Center

La PCD Giuvna dalla Surselva ha salvau il vendergis vargau sia davosa radunonza generala a Mustér. El futur porta la partida giuvna regiunala in niev num. «Il Giuven Center Surselva» e vegn a s'engaschar cun ina suprastanza engrondida per la regiun Surselva – en special pils interess dalla generaziun giuvna. Sco quei ch'il Giuven Center Surselva scriva en ina communicaziun vul ella gidar a rinforzar las estructuras economicas, culturalas e socialas e cheutras augmentar l'attractivdad dalla Surselva. Alla festivitad dil Giuven Center Surselva a Mustér il vendergis vargau ein ils participonts selegrai che gest dus cussegliers guvernativs, Marcus Caduffe Jon Domenic Parolini, ein stai presents. Sco anteriur commember dalla PCD Giuvna Surselva ha Marcus Caduff regurdau allas perspectivas per giuvenils ed explicau co il cantun vul promover in svilup persistent en ina regiun periferica sco la Surselva. Sco quei ch'il Giuven Center Surselva scriva ha la PCD giuvna Surselva gest saviu festivar il 20avel onn d'existenza ed ella sa mirar anavos sin dus decennis cun dabia engaschi. Sereina Caduff da Cumbel presidiescha il niev Giuven Center Surselva (cdm/fmr).



Dalla PCD Giuvna Surselva al Giuven Center Surselva, la nova generaziun politica ha retschiert sustegn dalla garda pli veglia.

FOTO MAD

VUORZ



Sittar cun ballester – in'attraziun surtut pils affons.

FOTO MAD

«Dis dil Meister» cun activitads e musica dil temps medieval

La fin d'jamna dils 2 e 3 d'october 2021 stat Vuorz ell'enzenna dil temps medieval: Sittar cun ballester, malegiar frescos sco il Meister da Vuorz ni guder musica dil temps da pli baul.

A bia gliend ei Vuorz enconuscent surtut pervia dallas interessantas picturas en sia baselgia. Quei scazi artistic propagescha il liug cun organiser differents arranchaments mintg'onn. In da quels ei sonda e dumengia el Curtgin grond. Sco quei ch'els organisatur scrivon en ina communicaziun als mieds da massa porscha il bein puril da bio visavi il hotel Ucliva la culissa ideala per differents activitads. Il program entscheiva la sonda avon miezdi denter auter cun l'Uniun per tecnicas da catscha prehistoricas ni era la puseivladad da malegiar frescos culla restauratura Brigitt Bütikofer. La sera vegn purschiu ina tscheina tenor il temps medieval e la dumengia entscheiva il di cun in survetsch divin cun ser Jan-Andrea Bernhard en accumpignament musical dalla formaziun «Mittelalter-Spiellüt». Cun activitads sco giugs e musica continuescha la dumengia. Denter auter vegn era purschiu ina cursa cun posts per affons en accumpignament da lur geniturs. Cun quels dus dis vul il Luvratori dil Meister da Vuorz far aunc pli enconuscent l'ierta culturala dil pictur nunenconuscent che ha giu malegiu il frescos ella baselgia. Sco ils organisatur constateschan quei era succeder en fuorma d'aventura cun elements creativs e da giug. Informaziuns detagliadas ein da catter sin www.waltensburger.ch. (fmr/hh)